



Pripremanje za život poslije smrti (Meka)

Hatib: dr. Abdullah ibn Avad el-Džuheni

1. džumadel-uhra 1442. po Hidžri / 15. januar 2021.

Sva hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi na Pravi put, niko ga u zabludu ne može odvesti, a koga u zabludi ostavi, niko ga ne može uputiti. Svjedočim da nema boga osim Allaha, Jedinog, Koji druga nema, i svjedočim da je naš vjerovjesnik Muhammed Njegov rob i poslanik.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio.” (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari su novotarije u vjeri, svaka novotarija je zabluda, a svaka zabluda vodi u Vatru. O muslimani, bojte se Allaha, Koji je stvorio stvorenja, Njemu se sve vraća i On daje uputu. Bojte Ga se onako kako Ga se boji onaj ko je svjestan Njegove blizine i moći, i vjerujte u Njega onako kako vjeruje onaj koji je priznao Njegovu jednoću. Niste stvoreni ni zbog čega drugog osim da biste postigli bogobojažnost, i sve blagodati koje vam je dao, dao je samo kako bi vam pomogle da budete bogobojažni.





O vjernici, svaki čovjek koji vjeruje u Allaha, Njegove meleke, knjige, poslanike, Sudnji dan i odredbu dobra i zla, sigurno zna da ide prema času koji je Allah propisao Svojim stvorenjima, a to je čas nestanka, kao što kaže Uzvišeni: “Sve što je na Zemlji prolazno je, ostaje samo Gospodar tvoj, Veličanstveni i Plemeniti.” (Er-Rahman, 26–27); “Svako doba imalo je Knjigu” (Er-Ra’d, 38). Svaki dan gledamo i ispraćamo na ahiret naše očeve, majke, sestre, djecu, komšije i prijatelje. Razmišljajte o svom povratku Allahu, nakon dunjalučkog života, o prvoj stepenici ahireta, kaburu, kada vam dođu dva meleka i upitaju vas za vašeg Gospodara, vjeru i vjerovjesnika, tada će “Allah vjernike postojanom riječju učvrstiti i na ovome i na onome svijetu, a nevjernike će u zabludi ostaviti; Allah radi šta hoće.” (Ibrahim, 27).

Razmisli, o čovječe, ko će biti tvoj saputnik u kaburu: ako si činio dobra djela, ona će ti doći u liku čovjeka lijepog lica, lijepe odjeće, lijepog mirisa, i reći ti: “Raduj se onome što će te usrećiti. Ovo je dan koji ti je obećan, ja sam tvoje dobro djelo.” Molimo Allaha da nam podari iz Svoje dobrote, plemenitosti, oprosta i zadovoljstva. Uzvišeni kaže: “... oni koji nisu vjerovali – na svoju štetu nisu vjerovali, a oni koji su dobra djela činili – sebi su džennet pripremili.” (Er-Rum, 44)

U komentaru ovog ajeta Mudžahid, Allah mu se smilovao, rekao je da riječi “... sebi su džennet pripremili” znače “u kaburu”, a Taberi, Allah mu se smilovao, rekao je da su sebi pripremili ono što će ih spasiti od kazne njihovog Gospodara.

Ili, ako si činio loša djela, doći će ti tvoja loša djela u liku čovjeka ružnog lica, ružne odjeće, neugodnog mirisa, i reći će ti: “Raduj se onome što će te rastužiti. Ovo je dan koji ti je obećan.” Utječemo se Allahu od Njegovog prezira, srdžbe i zla Njegove kazne. Možeš samo zamisliti, o čovječe, kako će biti ono što poslije toga dolazi, proživljenje, okupljanje, izlaganje djela, nagrada i kazna, obračun i ćuprija postavljena iznad Džehennema. Sve su to prizori koji će svi ljudi vidjeti i putevi koje će proći. Bojte se Allaha i pripremajte se za taj veliki dan, i opskrbite se za njega dobrim djelima, učinjenim iskreno, u Njegovo ime, i vjerujte u Njegovo obećanje, On je Zahvalni i Sveznajući. Uzvišeni Allah kaže: “O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite. I





ne budite kao oni koji su zaboravili Allaha, pa je On učinio da sami sebe zaborave; to su pravi grešnici. Nisu jednaki stanovnici Džehennema i stanovnici Dženneta; stanovnici Dženneta će ono što žele postići.” (El-Hašr, 18–20)

O muslimani, Uzvišeni Allah, naredio je Svojim robovima, vjernicima, da se oslone na Njega, a oslonac na Allaha, tevekkul, uzvišeni je srčani ibadet, koji se definira kao pouzdanje srca u Allaha i prepuštanje svih stvari Njemu, ovosvjetskih i onosvjetskih, u ostvarivanju koristi i otklanjanju štete. Obaveza ti je, o vjerniče, da se osloniš na svog Stvoritelja i Onoga Koji upravlja svim tvojim stvarima, a posebno u kriznim situacijama, i da poduzmeš vjerom dozvoljene korake, slijedeći u tome Vjerovjesnika, sallallahu alejhi ve sellem, koji se zaštitio s dva oklopa u Bici na Uhudu, i unajmio je vodiča prilikom hidžre, i naredio da se iskopa veliki rov oko Medine u Bici protiv saveznika (ahzab), i pronosio je hrabro bajrak tevhida – vjere u jednog Boga, oslanjajući se na svog Gospodara, i poduzimajući sve potrebno, demonstrirajući na taj način princip tevekkula – oslonca na Allaha, vezivanja srca za Allaha, a zatim poduzimanje svih propisanih mjera i koraka. Od milosti Gospodara jeste i to da je, nakon teškoće i nedaće koja snašla čovječanstvo, u vidu bolesti korone, uputio čovjeka da iznađe efikasan lijek, vakcinu, prihvaćen od relevantnih zdravstvenih institucija, koji bi, Allahovom dozvolom, trebao biti zaštita od ove opake bolesti.

O vjernici, u poduzimanje potrebnih koraka spada i vakcinisanje preporučenim vakcinama (protiv bolesti izazvane virusom korona) i savjetovanje drugima da se vakcinišu u skladu s uputama Ministarstva zdravlja, i da ne nasjedaju na dezinformacije koje šire neupućeni o neefikasnosti ove vakcine. “Kako krupna riječ izlazi iz usta njihovih! Oni ne govore drugo do neistinu!” (El-Kehf, 5)

U ovom kontekstu treba istaći trud koji ulažu vlasti ove zemlje, Allah ih čuvao, u obezbjeđenju besplatne vakcinacije za sve njene stanovnike, a sve u interesu zaštite njihovog zdravlja i smanjenja mogućnosti zaraze ovom bolešću. Štaviše, ova država je među prvima krenula u nabavku vakcine protiv bolesti izazvane virusom korona, kako bi spriječila širenje panike i stvaranje negativnog ambijenta, i zato molimo Allaha da ih nagradi najboljom nagradom, da ono što su učinili za ovu zemlju bude





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

na vagi njihovih dobrih djela i da ih sačuva svakog zla i neugodnosti. Naša obaveza u tom pogledu je da pomognemo državi u ovom hairli poslu, oslanjajući se na Allaha i poduzimajući propisane korake, i da prihvatimo vakcinaciju kao vid borbe u suzbijanju ove bolesti, i molimo Allaha da nas sačuva i zaštiti. “Jedni drugima pomažite u dobročinstvu i čestitosti, a ne sudjelujte u grijehu i neprijateljstvu; i bojte se Allaha, jer Allah strašno kažnjava.” (El-Maida, 2)

Znajte da vam je Allah naredio da donosite salavate na svog Poslanika rekavši: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56)

Poslanik, sallallahu alejhi ve sellem, kaže: “Allah donese deset salavata na onoga ko na mene donese jedan salavat.”

